

DIZRA'DAU' GUXUNNE' DA BZUAJ SAN JUAN

San Juan dxenné' da chawe' chee benne' le' Gayo

¹Neda', benne' gula wən zrin chee Cristo, dxuzúaja' da nigá chiu' lue', Gayo, bi nazrí'ite lazra'. Da líqueze nazrí'ida' lue'.

²Lue', bi nazrí'ite lazra', dxenaba' lau Dios gaca da chawe' chiu', ne su' chawe', ca dxaca chee bēnne'du xu'.

³Gubéle'eda' gate belelá' tu chupa benne' bíchedxu, ne gulé'e neda' ca dxéajle'u chee Xránadxu, ne ca dxunu' ca naca da li.

⁴Québequeze bi de da gundxa na neda' súale'a xel-la' dxebé, ca xel-la' dxebé da zua' gate dxenda' dxelún benne' zaj naque' ca zrí'inequeza' ca naca da li.

⁵Lue', bi nazrí'ite lazra', nacu' benne' li lazre' ca naca da dxunu' dxácalenu' bi bíchedxu ca', ne da naca blaudxa dxácalenu' bi bíchedxu za'aque' xezre xula. ⁶Lau benne' zaj nazrague' chee Dios nigá dxuluchalaj bi bíchedxu caní ca nazri'inu' bi bíchedxu ca'. Da cháwedau' dxunu' gate dxugú'u benne' caní neza, dxácalenu' le' ca naca da dxezaca ba lazre' Dios. ⁷Benne' caní zjaque' dxelune' zrin nigá lawe' da zaj nazri'ine' Cristo, ne quebe bi dxelezi'e da xelunna benne' quebe zaj núnbe'e Dios. ⁸Chee le' na' dxal-la' gápadxu ba lá'ana benne' caní chee gúnledxu le' zrin chee da li.

Da calela da dxun benne' le' Diótrfes

⁹Ba bzuaja' chee benne' zaj nazrague' chee Dios naga zu', na' bēnnea' le' Diótrfes quebe dxape' netu' ba lá'ana lawe' da dxaca lazre' gaque' blau lávela benne' ca'. ¹⁰Chee le' na', che xida' naga zu', guzéajni'ida' benne' ca' ca naca da dxun bēnnea', dxezí tizre' netu', ne dxennéle'e cheentu'. Quegá da

nigáze dxunē', san cá'anqueze quebe dxezí' lu ne'e benne' bíchedxu zá'aque' ga na', ne quebe dxu'e lataj benne' ca' dxelaca lazre' xezezí' lu ne'e benne' caní, ne dxexebéaje' le' ládujla benne' ca' zaj nazrague' chee Dios.

¹¹Lue', bi nazrí'ite lazra', quebe gunu' lue' ca naca da calela da dxelún benne' caní. Ben ca naca da xrlátaje. Bénnea' dxunē' da xrlátaje naque' chee Dios, san nu benne' dxunē' da calela, quebe ne gúnbeaqueze' Dios.

Da xrlátaje da dxun benne' le' Demetrio

¹²Xúgute benne' dxelenné' da chawe' ca naca da dxun Demetrio, na' da líqueze naca bea na ca dxunē'. Cá'anqueze netu' dxixruj beantu' ca naca da dxunē', na' lue' nézqueznu' dxuchálajntu' da li.

Dizra' bzebe

¹³Déle'e da dxal-la' guchálajlena' lue', san quebe dxaca lazra' guzúaja' na lu xícheze, ¹⁴lawe' da dxebeza lazra' lé'etequezda' lue'. Nadxa guchálajdxu caníqueze.

¹⁵Dxenaba' lau Dios sua zrize lazrda'u. Bi bíchedxu zaj zra' nigá dxulugape' lue' diuzre. Bgapa lue' diuzre tu tu benne' bíchedxu zaj zre'e naga zu'. Ca'an gaca na.